277*

Trivixan el cavalier luogotenente. Come ha avisi di preparation si fa di zente a piedi di Vilacho, quali menazano, compido la trieva, venir in la Patria a danni: però si soliciti le zente dia venir; et altre particularità ut in litteris.

Fo sposato do done maridate in questa matina, una a San Baxeio fia di sier Bartolomeo Loredan in sier Agustin Moro, l'altra fo fia di sier Marco Loredan, in sier Francesco Calbo a San Polo. Et vi fu assa' zentilhomeni a ditti pransi, e poi disnar fu fato le noze di la fia di sier Zuan Dolfin in sier Jacomo Zen qu. sier Marin; sichè Colegio non si reduse.

Et a hore zercha 23, vene uno nontio di Franza qual portò letere a la Signoria di sier Andrea Griti, date a Bles a di 7, tutte in zifra. Et fo mandato per quelli di Colegio si potevano trovar. Vene sier Francesco Bragadin consier, sier Alvise da Molin, sier Antonio Trun et sier Zacharia Dolfin savii dil Consejo, e li savii numero 3 di terra ferma, et fono, poi cavate di zifra, lecte in camera dil Principe, e tutti veneno fuora taciti, adeo fo sospeto non esser venuta la liga con Franza, imo esser dificultà, e tutti restono suspesi, maxime quelli di Pregadi che non poteno intender nulla, perchè le letere fo lete con quelli entrano nel Conseio di X. Eravi Cao di X sier Marco Donado: sichè tutti fono di mala voja. Il tenor di le qual letere noterò di soto. Ltiam vene un altro messo pur con dite letere duplicate, et dil signor missier Zuan Jacomo Triulzi da Ors, di 14, si ave uno aviso a bocha. El qual nontio segondo fo Troylo e portò letere di 8 del Griti, replicate ma con una zonta, e il primo era uno chiamato fra' Corado svizero. Et lete dite letere, poi li savii de terra ferma, zoè sier Lorenzo Capelo, sier Gasparo Malipiero e sier Zorzi Marin dotor, che altri non erano, tornono in Colegio a ordinar certe letere in campo e altrove non da conto, fino hore 3 di note.

In questa matina in Colegio fu preso parte dar doni a chi condurà biave.

A dì 18 la matina, pleno Colegio. Fo leto le do letere di Franza, date a Bles di sier Andrea Griti procurator, trate di zifra, è molto longe, una di 6 e l'altra di 8. Tamen, par non sia risposta di le nostre di 25, che li fo mandà con li capitoli de la liga conclusi in Colegio e sotoscriti per li deputati per il Colegio, e per quel secretario di missier Zuan Jacomo Triulzi qual è qui ancora in caxa di Gasparo di Vedoa. Et dite letere, fo lete con li Cai di X e con gran credenza. Hor fra' Corado e quel Troylo che à portà le letere, è tenuti secreti, e non vano atorno.

Fo divulgato, da chi desidera saper di novo: che dite letere di Franza si conteniva il Roy non vol far la Liga altramente che li resti Cremona e Geradada, et mostra non haver auto li capitoli fo mandati; tamen il tempo serve che li possa haver auti.

Di Roma, etiam vene letere dil Foscari orator nostro, di . . et 10. Il sumario è questo. Prima, coloqui ha auti col Papa, el qual sta molto anxioso e non ben sano, per le cosse occorono. Dubita dil fato suo, maxime intrando la Signoria in nova liga con Franza, e si tien, si la se concluderà, etiam il Papa intrarà; adeo Soa Santità è indisposta alquanto, si meraviglia non vengi risposta dil suo orator Stafileo e non si à letere di qui zà uno mexe. Item, ha mandato a chiamar il cardinal Sedunense sguizaro, ch' è a Milan, vengi a Roma, el qual pareva volesse mandar al suo vescoado in terra di sguizari; et è venuto letere al Papa e a li cardinali di Maximian Sforza duca di Milan di . . ., li avisa la sua intrata in Milan. Item, zerca apelarsi al Concilio in caso seguisse le censure, il Papa non vol si fazi, perchè non vol dar autorità al Concilio sopra de lui; ma ben sarà contento, in caso siegua apelarsi a Soa Santità ad melius audiendum; ma si tien il Papa non scomunicherà. Item, è aviso di Spagna che francesi è levati di Pampalona, e andati a le stantie. Item, è letere di Rohan di Franza, di 25, come è concluso l'acordo dil Roy con la Signoria nostra, e li romarà al Roy Cremona e Geradada, et che erano zà fati li capitoli, etc.

Da poi disnar, fo Conseio di X con la zonta di 278 presonieri, e fu fato per non far Pregadi e li savii consultino ben quello si habbi a far; forsi si averà qualche altro aviso di Franza.

Fo spazato uno padoan, era in l'armamento, nominato Zuan Antonio Zacaroto dotor, videlicet confinà per anni . . . a la Cania, e privo poi in perpetuo di Padoa e il padoan. Item, altri di Ruigo asolti, e altri di Vicenza sia ben presi, e uno prete ch' el sia esaminà con il vicario; sichè cinque presonieri fonno expediti.

Di campo, vene letere di San Bonifazio, dil proveditor Capello, di 17. Come in quela matina era partito sier Bartolomio Contarini va capitano a Crema; li havia dato scorta sier Alexandro Donato e alcuni altri cavali lizieri. Item, scrive, zerca mandar fanti in Friul, havia spazà certo numero ut in litteris, videlicet e nomina li capi, come noterò di soto. Ha scrito a li rectori non lassi passar altri soldati e li svalizi. Item, si mandi danari per pagar quelle zente etc.

Noto. Li oratori do di sguizari è partiti non ben satisfati di la Signoria, perchè non è stà apresentati,